

HEIMAVIST MA OG VMA

Eyrarlandsvegur 28 • 600 Akureyri • sími 455-1600 • Fax 455-1601
www.heimavist.is • heimavist@heimavist.is • Kt. 630107-0160



Skýrsla fyrir skólaárið 2011-2012

Almennt

Lundur rekur nemendagarða fyrir báða framhaldsskólana á Akureyri; annars vegar í nýbyggingu Lundar og hins vegar í eldri byggingu sem áður hýsti heimavist MA. Byggingarnar eru tengdar saman með björtu og rúmgóðu anddyri.

Lundur er sjálfseignarstofnun sem rekur nemendagarðana á grundvelli þjónustusamnings við menntamálaráðuneytið frá desember 2001. Samningurinn kveður á um að Lundur tryggi íbúum nemendagarðanna frambærilegt húsnaði til búsetu, öruggar og heimilislegar aðstæður ásamt eftirliti með íbúunum auk viðunandi þvottaþjónustu og fullnægjandi mótuneytisaðstöðu. Með samningi við mótuneyti MA fól Lundur mótuneyti MA að reka mótuneyti og þvottahús á nemendagörðunum samkvæmt þjónustusamningi Lundar við menntamálaráðuneytið.

Á nemendagörðum Lundar er rými fyrir 333 íbúa og er þá miðað við að tvímennt sé í öll herbergi nýbyggingarinnar og í þrjú stærri herbergi á gömlu vistinni, en hefðbundnu herbergin á gömlu vistinni eru nýtt sem eins manns herbergi á veturna.

Þar sem fyrrum húsakynni heimavistar MA voru tekin til notkunar fyrir hina nýju nemendagarða koma 215 rými í hlut Menntaskólans og 118 rými í hlut Verkmenntaskólans.

Aðsókn

Líkt og undanfarin ár var aðsókn að nemendagörðunum umfram getu skólaárið 2011 til 2012 en vinnuregla skólanna við inntöku nemenda á garðana er að yngri nemendur hafi forgang. Þá hefur stjórn Lundar og skólameisturum þótt eðlilegt að vanda valið við inntöku nemenda og forðast ónýtt rými á görðunum. Því er sú krafa gerð gagnvart íbúum sem nýta sér búseturétt hjá Lundi, að þeir skuldbindi sig til að búa á görðunum yfir skólaárið meðan þeir halda eðlilegri náms framvindu. Nemendum sem hætta námi eða falla frá námi er þó unnt að segja upp húsaleigusamningi með stuttum fyrirvara.

Góð nýting nemendagarðanna er eðlileg krafa þegar umsóknir um búsetu á görðunum eru töluvert umfram herbergjaframboð. Góð nýting er einnig mikilvæg fjárhagsleg forsenda garðanna og þar munar um hvert prósentustig.

Fjöldi íbúa

Á Heimavist MA og VMA voru við upphaf skóla haustið 2011 alls 333 nemendur eða 170 nemendur MA og 163 nemendur VMA.

Kynjahlutfallið skiptist þannig milli skólana: Hjá íbúum VMA voru alls 49% stúlkur og 51% piltar. Hjá MA voru 62% stúlkur á móti 38% pilta. Kynjahlutfall allra íbúa hefur verið nokkuð svipað undanfarin ár en horfa þarf til ársins 2008 þegar piltar voru í meirihluta íbúa á heimavistinni.

Ef skoðuð er tafla yfir aldursdreifingu íbúa við upphaf skóla haustið 2011 voru 63% allra nemenda ólögráða við upphaf skóla. Hlutfallið skiptist svipað milli skólana eða 68% nemenda MA voru ólögráða meðan að 57% nemenda VMA voru ólögráða.

Aldursdreifing íbúa við upphaf skóla haustið 2011

	Aldursdreifing allra íbúa	Aldursdreifing MA íbúa	Aldursdreifing VMA íbúa
Íbúar fæddir árið 1996	2%	5%	
Íbúar fæddir árið 1995	34%	37%	29%
Íbúar fæddir árið 1994	27%	26%	28%
Íbúar fæddir árið 1993	25%	24%	27%
Íbúar fæddir árið 1992	9%	7%	12%
Íbúar fæddir árið 1991	2%	1%	3%
Íbúar fæddir árið 1990	1%		1%
	100%	100%	100%

Á hverju skólaári dvelja systkini á heimavistinni sem fá sérstakan systkinaafslátt af húsaleigunni. Skólaárið 2011 til 2012 bjuggu 35 systkini á görðunum og er það fækkun frá fyrra skólaári þegar 39 systkini bjuggu á görðunum.

Lögheimili nemenda

Íbúar nemandagarðanna sækja heimavistina víða að af landinu eins og eftirfarandi tafla sýnir en taflan birtir flokkun íbúa eftir lögheimilisskráningum í september 2011:

Skipting íbúa eftir skólum og lögheimili í upphafi skólaárs 2011

	VMA íbúar	MA íbúar	Allir íbúar
Suðvesturland og Suðurland	3%	15%	9%
Vesturland	1%	3%	2%
Vestfirðir	3%	2%	3%
Norðvesturland	38%	24%	31%
Eyjafjörður (þ.m.t. Siglufjörður)	12%	20%	16%
Norðausturland utan Eyjafjarðar	27%	25%	26%
Austurland	15%	10%	12%
Erlendis	1%	1%	1%
	100%	100%	100%

Eins sjá má þá voru flestir nemendur sem sækja heimavistina frá Norðurlandi (Norð-vesturland og Norðausturlandi utan Eyjafjarðar). Flestir MA íbúar komu úr Eyjafirði en flestir VMA íbúar komu frá Norð-vesturlandi.

Heimili íbúanna

Nemendagarðar Lundar eiga að vera tryggt og öruggt heimili íbúanna og er kappkostað að svo sé enda mikilvægt fyrir foreldra/forráðamenn nemenda að haft sé eftirlit með hegðan og líðan íbúanna. Á skólaárinu voru reglur heimavistar yfirfarnar en rauði þráðurinn í reglunum er líkt og áður að íbúar skuli temja sér góða umgengni á görðunum og umhirðu herbergja sinna, virða næðistíma á næturna og að öll meðferð áfengis og fíkniefna sé stranglega bönnuð og varði brottrekstur.

Reglum og eftirliti með hegðan og líðan íbúanna var skólaárið 2011-2012 líkt og undanfarin ár fylgt eftir með uppbyggilegum ábendingum og afskiptum eftir þörfum.

Hjúkrunarfræðingur hafði líkt og fyrri skólaár reglulega viðtalstíma á görðunum, veitti íbúum aðstoð og liðsinnti um frekari heilbrigðisþjónustu ef á þurfti að halda. Á skólaárinu tók nýr hjúkrunarfræðingur við af Margréti Pétursdóttur sem hafði sinnt starfinu frá upphafi.

Hagsmunamál íbúa

Íbúar kjósa sér hagsmunaráð heimavistarinnar, öðru nafni heimavistarráð. Heimavistarráð starfaði með Heimavistarstjóra og vann að framgangi sameiginlegra hagsmunamála íbúanna. Heimavistarráð skipulagði einnig félagsstarf og vann að undirbúningi félagslegra atburða á görðunum. Á skólaárinu 2011-2012 stóð heimavistarráð fyrir: Jólaföndri, laufabrauðsgerð, jólahlaðborði, þorablóti, bingói, bíókvöldi, þremur Pub Quis kvöldum og opnu húsi á sumardaginn fyrsta þar sem heimavistarráðið bakaði og bauð upp á vöfflur og skúffuköku. Heimavistarráð endaði vetrardagskrána með “stóru kvöldvökunni” í Kvosinni þar sem boðið upp á fjölbreytt skemmtiatriði, pizzur og íspinna.

Auk félagslegra viðburða stóð Heimavistarráð fyrir því að sjónvarpsherbergi íbúa var málað og teppalagt og keyptur var flatskjár og flakkari.

Efnt var til samkeppni meðal nemenda um nýtt merki „logo“ fyrir Lund en allir nemendur VMA og MA höfðu rétt á þátttöku. Viktor Örn Valdimarsson nemandi í VMA og íbúi á heimavistinni átti vinningstillöguna (sjá forsiðu) og hlaut peningaverðlaun að launum.

Agamál

Í samstarfi við skólameistara hefur Lundur mótað skýrar vinnureglur um meðferð og afleiðingar áfengisagabrota á görðunum. Viðurlögin við áfengisagabrotum fara eftir eðli brotanna en drykkja íbúa á görðunum er brottrekstrarsök. Þá hafa einnig verið mótaðar vinnureglur um meðferð og afleiðingar vímuefnanotkunar sem eru alvarlegustu brot á agareglum nemendagarðanna. Áhersla hefur verið lögð á samstarf við foreldra og forráðamenn þegar slík mál koma upp. Samkvæmt reynslu er mesta hættan á áfengisagabrotum á vorönn þegar dag tekur að lengja.

Skólaárið 2011 til 2012 var tveimur íbúum vikið af vist vegna áfengisagabrots.

Skipulags- og rekstrarmál.

Skipulagsbreytingar áttu sér stað hjá Lundi á árinu en nýr framkvæmdastjóri tók til starfa auk þjónustustjóra og starf húsbónda var lagt niður. Þá urðu breytingar á fyrirkomulagi vakta.

Alls störfuðu 9 starfsmenn á skólaárinu 2011-2012: 2 öryggisverðir á næturvakt, 2 starfsmenn á skiptum vöktum á daginn og kvöldin, 1 starfsmaður á morgunvöktum og 2 starfsmenn sem sáu um öryggisvörslu, þrif o.fl. um helgar. Auk þjónustustjóra og heimavistarstjóra.

Á árinu var sú nýbreytni tekin upp að bjóða nokkrum íbúum upp á vinnu yfir vetrartímann. Starfið fólst í ýmis konar aðstoð við starfsmann á vakt s.s. við að ryksuga, fylla á lagera o.s.frv. Þrír íbúar störfuðu yfir vetrartímann og unnu að jafnaði 2 klst. á viku.